

BAB 1 : PENDAHULUAN

1.0 Latar Belakang Kajian

Kajian Pengesanan Graduan mula dijalankan di peringkat nasional pada tahun 2002 atas inisiatif dan penyelarasan Unit Perancang Ekonomi (UPE), Jabatan Perdana Menteri dengan kerjasama Institusi Pengajian Tinggi Awam (IPTA) dan Politeknik. Kajian ini dijalankan terhadap graduan yang tamat pengajian dan layak menerima ijazah pada tahun berkenaan. Ia dijalankan secara manual oleh masing-masing Institusi Pengajian Tinggi (IPT). Dari tahun 2003 hingga 2004, kajian ini telah diselaraskan oleh Kementerian Pelajaran Malaysia dan selepas itu oleh Kementerian Pengajian Tinggi Malaysia (KPTM). Pada tahun 2006, Kementerian Pengajian Tinggi Malaysia telah mengambil inisiatif untuk menjalankan kajian ini secara dalam talian bagi mengatasi pelbagai masalah yang dihadapi terutamanya bagi memudahkan pengurusan rekod yang banyak, kos pengendalian yang tinggi dan masalah penyimpanan data yang kurang selamat dan tidak setempat. Dengan terlaksananya sistem dalam talian ini, KPT telah dapat meningkatkan keberkesanan sistem dari sudut penambahan bilangan penyertaan IPT, tahap kualiti data yang dikumpulkan dan juga meningkatkan kecekapan dalam penganalisan serta penyediaan laporan.

Tujuan utama kajian ini dijalankan adalah untuk mengetahui perkara asas berkaitan alam pekerjaan graduan baharu, termasuk tentang kebolehdapatan kerja graduan (*graduate employability*), kebolehpasaran, status pekerjaan, taraf pekerjaan, jenis pekerjaan, pendapatan dan majikan graduan. Di samping itu, kaji selidik ini juga bertujuan mendapatkan pandangan dan penilaian graduan terhadap aspek institusi seperti keberkesanan program yang dilalui, penilaian terhadap prasarana dan pelbagai kemudahan yang disediakan, serta juga persepsi graduan terhadap proses pembelajaran dan pengajaran. Kajian Pengesanan Graduan 2007 merupakan siri kedua Kajian Pengesanan Graduan yang dijalankan oleh KPT secara dalam talian. Kali pertama kajian secara dalam talian ini dijalankan ialah pada tahun 2006. Kajian ini melibatkan graduan Institusi Pengajian Tinggi Awam (IPTA), Institusi Pengajian Tinggi Swasta (IPTS), Politeknik, Kolej Komuniti dan Institut Pendidikan Guru. Fokus utama kajian ini ialah terhadap graduan pada peringkat Diploma dan ke atas yang menamatkan pengajian dalam tahun 2007. Bagaimanapun, graduan pada peringkat sijil juga turut memberi respons kepada kajian ini. Di samping itu, terdapat juga sebilangan kecil graduan yang telah tamat pengajian pada tahun sebelumnya tetapi hanya mendapat ijazah pada tahun 2007.

Pada tahun 2007, sebanyak 147 buah IPT telah turut serta dalam kajian ini berbanding 83 IPT pada tahun 2006. Ini menunjukkan satu peningkatan yang sangat memberangsangkan. Pada masa yang sama, KPT kian menerima banyak permintaan daripada pelbagai agensi kerajaan, swasta dan akademik bagi mendapatkan hasil laporan kajian yang lebih terperinci. Justeru itu, bagi membantu pihak berkepentingan ini mendapatkan maklumat secara mudah, KPT pada tahun 2007 telah mengambil inisiatif untuk menerbitkan hasil laporan yang lebih komprehensif dalam bentuk penerbitan buku. Laporan hasil kajian ini diterbitkan dalam tiga jilid dengan Jilid I memberikan tumpuan kepada graduan pada peringkat Diploma yang menerima ijazah pada tahun 2007. Jilid II berkaitan hasil kajian graduan pada peringkat Ijazah Pertama (Ijazah Sarjana Muda) dan Jilid III berkaitan dengan graduan pada peringkat Pascaijazah. Usaha juga sedang dijalankan bagi menyediakan perkhidmatan maklumat berkaitan kajian ini secara dalam talian dan mengikut permintaan. Laporan yang dijilid ini tidak termasuk hasil analisis berkaitan persepsi dan kepuasan graduan terhadap pelbagai aspek seperti kurikulum, program pengajian dan prasarana di IPT. Buat masa terdekat ini, laporan berkaitan aspek ini hanya diberikan mengikut keperluan dan berdasarkan permintaan sahaja.

1.1 Metodologi Kajian

Kajian ini dijalankan mengikut tarikh konvokesyen setiap IPT. Lazimnya sistem dibuka kepada graduan dua ke tiga minggu sebelum tarikh konvokesyen bermula dan ditutup seminggu selepas tarikh tamat konvokesyen. Bagaimanapun, setiap IPT boleh memohon kepada KPT untuk membuat sedikit perubahan tarikh tutup dan buka sistem kepada graduan mereka.

Soal selidik yang disediakan dalam Sistem Kajian Pengesanan Graduan KPT (SKPG) mengandungi tujuh bahagian. Bahagian A ialah *Latar Belakang Graduan* yang terdiri daripada maklumat asas seperti nama, nombor kad pengenalan, matriks, jantina, taraf warganegara, ijazah dianugerahkan, fakulti, peringkat pengajian, bidang pengajian, pengkhususan dan PNGK/CGPA. Kebanyakan data dalam Bahagian A disediakan oleh IPT berkenaan yang dihantar ke KPT enam hingga lapan minggu sebelum sistem dibuka kepada graduan.

Bahagian B merangkumi soalan berkaitan *Pengalaman Graduan Semasa Mengikuti Pengajian di IPT* dan diikuti Bahagian C, *Keberkesanan Sistem Pengajian di IPT daripada Perspektif Graduan*. Bahagian D pula ialah soalan bagi mendapatkan butiran daripada *Graduan yang Melanjutkan Pengajian Setelah Tamat Pengajian*. Bahagian E, *Status Terkini Graduan* iaitu sama ada bekerja, tidak bekerja atau kategori lain. Bahagian F khusus untuk mengumpul *Maklumat tentang Pekerjaan Graduan* termasuk yang bekerja sendiri. Bahagian G, ialah kategori *Graduan yang Belum Bekerja dan Sebagainya*. Mereka diminta memberi sebab-sebab belum bekerja, pilihan sektor pekerjaan mengikut

keutamaan dan juga butiran tentang kekerapan menghadiri temu duga. Bahagian H ialah soalan umum berkaitan kesediaan graduan menerima maklumat daripada pihak ketiga seperti maklumat tentang kekosongan jawatan, *tips* untuk mendapatkan pekerjaan, peluang melanjutkan pengajian dan sebagainya.

1.2 Susunan Laporan

Laporan dalam Jilid I ini terbahagi kepada tujuh bahagian iaitu Bab 1 tentang *Latar Belakang Kajian* serta metodologi yang digunakan. Bab 2 tentang *Lulusan Graduan IPT* secara keseluruhan. Bab ini memaparkan lulusan graduan bagi setiap IPT mengikut peringkat pengajian, gender, kewarganegaraan, bidang pengajian utama dan juga mod pengajian yang diikuti.

Bab 3 menyatakan *Lulusan Graduan pada Peringkat Diploma bagi Setiap IPT*. Bab ini melaporkan secara terperinci statistik tentang lulusan graduan Diploma oleh IPT. Bagi memudahkan rujukan, jadual yang berkaitan dilampirkan pada akhir setiap bab. Lampiran A mengandungi senarai diploma yang dianugerahkan oleh setiap IPTA, IPTS dan Politeknik dalam tahun 2007.

Bab 4 memaparkan *Kadar Respons dan Dapatan tentang Profil Responden Diploma*, termasuk umur, negeri bermastautin, pendapatan keluarga, penaja pengajian dan status pekerjaan. Bahagian ini juga memberikan analisis terperinci tentang status pekerjaan mengikut bidang pengajian utama dan subbidang.

Bab 5 menerangkan *Maklumat yang Berkaitan dengan Pekerjaan Graduan Diploma* seperti taraf pekerjaan, sektor pekerjaan, pendapatan bulanan, kumpulan pekerjaan utama dan cara mendapatkan pekerjaan. Manakala Bab 6 ialah *Analisis Graduan Diploma yang Sedang Mengikuti Pelbagai Pengajian Selepas Tamat Pengajian*. Antara aspek yang dilaporkan ialah mod pengajian, peringkat melanjutkan pengajian, institusi di mana graduan 2007 melanjutkan pengajian, pembiayaan pengajian, sebab-sebab melanjutkan pengajian dan perkaitan bidang pengajian sekarang dengan sebelumnya.

Bab 7 menyatakan *Analisis Graduan Diploma yang Belum Bekerja*. Antara maklumat yang diperhalusi ialah profil graduan yang belum bekerja termasuk gender, pencapaian akademik, pendapatan keluarga dan sebab-sebab belum bekerja, penggunaan perkhidmatan bimbingan dan kaunseling, kemahiran yang ingin diikuti oleh graduan, temu duga yang pernah dihadiri dan sektor pekerjaan yang dipilih mengikut keutamaan.